

Gvangjsih Minzcuz Bau

Cawjguenj: Gvangjsih Bouxcuengh Swcigh Minzcuz Cunghgyau Swvu Veijyenzvei Cawjbanh: Gvangjsih Minzcuz Bause Geiz neix 8 banj
广西民族报 Aenhauh okbanj: CN45-0036 B.2022 Nd.9 Ng.28 Liggaueq nyaemzyinz nienz ndwengouj cosam Geizsoq: Gungh daih 3543 geiz

Boux Daibyauij Camgya Aen Hoih Daibyauij Daengx Guek Baez Daihngeihcib Cunghgoz Gungcanjdangj Senj Liux 出席中国共产党第二十次全国代表大会代表全部选出

Sinhvaze Baekging 9 nyied 25 hauh dien Ndaej daengz Dangj-cunghyangh aeu Siz Ginbingz dungzci guh vaedsim haenx giengienz lingjauj, hong senj boux daibyauij Ngeihcib Daih Dangj gaenq swnhleih guhsat. Daengx guek gak aen danhvei senjgij faenbied hai aen hoih dangj daibyauij, senjok 2296 boux daibyauij camgya Ngeihcib Daih Dangj.

Boux daibyauij Ngeihcib Daih Dangj, dwg dingjmaenh yungh gij swhsiengj sevei cujyi miz daegsaek Cunghgoz seizdaih moq Siz Ginbingz guh dazyinx, dingjmaenh yungh dangjcangh guh gij ciuqei gaenbonj, dingjmaenh cunghcij singqcaet dangj, dingjmaenh caeuq gyagiengz dangj cienzmienh daiqlingx, cunghfaen fat-yiengz ndaw dangj minzcuij, yiemzgek ciuq gij iugouz Dangjcunghyangh gvendaengz hong senj boux daibyauij, yungh gij banhfap daj laj daengz gwnz, gwnz laj giethab, fanfoek ngeixnaemj, caengz dem caengz senjleh senj okdaej.

Boux daibyauij senj ndaej cungj-daej hab diuzgen Dangjcunghyangh dingh, miz swhsiengj cwngci suciz haemq sang, cozfungh binjhingz ndei caeuq naengzlig lwnh saeh haemq ak, youq gak aen ganghvei guh'ok cingzcik yienhda, dwg boux maenh-ndei ndaw gungcanjdangjyenz; daibyauij gezgou caeuq faenbous haemq habeleix, gak hangh beijaeh cungj hab Dangjcunghyangh iugouz, daibyauij ndaej vunz lai. Ndaew goengqde mboujdan miz dangjyenz lingjauj ganbu, youh miz dangjyenz youq daih'it sienq guh hong, miz itdingh soq dangjyenz mbwk, dangjyenz siujsoq minzcuz, miz boux daibyauij ginghci, gohgi, cwngfaz, gyauyuz, senhconz, vwnzva, veiswng, dijjuz caeuq sevei guenjieix daengj gak aen gizdieg.

Gij shwghwz boux daibyauij camgya Ngeihcib Daih Dangj, daengzseiz lij aeu Aen Veijyenzvei Saemjcaz Shwghwz Daibyauij Ngeihcib Daih Dangj nyinhdingh.



Yungzsuij:
Angqcoux Ngeihcib Daih Roen Moq Haengrengz Guh
融水:喜迎二十大 奋进新征程

9 nyied 23 hauh banhaemh, Yungzsuij Myauzcuz Swciyen banh doxdax fouxgvangjangz daengx biengz lienhdang "angqcoux Ngeihcib Daih · roen moq haengrengz guh", gak aen doih foux doxlwnz hwnj daiz diuq foux, yinx ndaej haujlai vunz daeuj yawj.
(Lungz Linzci ingj)

Gvangjsih Minzcuz Gyauyuz 10 Bi Doxdaej Aeundaej Cingzcik Yienhda 广西民族教育 10 年来取得显著成就

Mboengqneix, gicej daj mizgven bouhmonz roxyiuj, Cibbet Daih Dangj doxdaej, Gvangjsih gyauyuz hidungj cienzmienh gvancez doeksaed gyauyuz fuengcim caeuq minzcuz cwngcwz dangj, youq hagdangz hauejlaeg guh minzcuz doxgiet cinbu gyauyuz, mboujduenh couqmaenh gij eijsik caezcaemh Cunghvaz Minzcuz, dieg minzcuz gyauyuz hwngfat suijsingz caeuq daengx gih doxcaez daezswng, aeundaej cingzcik yienhda.

Gvangjsih dwg dieg minzcuz, dangj yawjnaek minzcuz gyauyuz saehnieb hwngfat dangqmaz, youq cungh siuj hagdangz cienzmienh hai dangzgoq minzcuz doxgiet cinbu, youq gauhyau hai son'gyauq couqmaenh gij eijsik caezcaemh Cunghvaz Minzcuz, youq cungh siuj hagdangz cienzmienh doihengz yungh 《Cunghvaz Minzcuz Daih Doxgiet》 daengj sawsonhag guekgya doengjit bien haenx, mwh cujciz bien 《Gvangjsih Gyaeundei》《Gvangjsih Saekhoengz》《Sawcuengh Vahcuengh》 daengj sawsonhag deihfueng, yungzhaej gyauyuz neiyungz couqmaenh gij eijsik caezcaemh Cunghvaz Minzcuz ndeindi, daengx gih da cungh siuj hagdangz saedyienh vah saw guekgya doeng'yungh gyauyuz gyauyoz 100%, 2020 nienz Gvangjsih Vahbujdungh bujgizliz daengz 85.68%, sang gvaq daengx guek bingzyaenz suijsingz ca mbouj geijlai 5 aen bakfaendiemj, vih gak cuz lauxsae hagseng dox baedauq doxgyau doxyungz roengz gie vahgangj.

Yungh ndei vwnzva saekhoengz, vwnzva minzcuz, vwnzva bien'gyaiq daengj gij swhyenz ndei lai, gaenxmaenx vih gak cuz lauxsae hagseng hwnqguh aen gyaranz cingsaenz caezcaemh. Cauhlaeb 100 aen hagdangz guhyienh son'gyauq minzcuz doxgiet cinbu, 100 aen hagdangz guhyienh son'gyauq cienzswnj feihvuzciz vwnzva yizcanj, 156 aen hagdangz guhyienh son'gyauq vwnzva minzcuz caeuq 52 aen dieg cizyez gyauyuz cienzswnj minzcuz vwnzva. Gujli hagdangz yungh cawjdaez banhoih, aendoih hozdung, swng geiz yizsiz, ciengzbauq banjbau daengj hingzsik hagseng haengj dingq gyaez yawj haenx guh son'gyauq lwnghangj couqmaenh gij eijsik caezcaemh Cunghvaz Minzcuz, gyalai gak cuz hagseng nyinhdoengz guekcoj hungmbwk, Cunghvaz Minzcuz, Cunghvaz vwnzva, Cunghgoz Gungcanjdangj, sevei cujyi miz daegsaek Cunghgoz.

Ciuq cam rox, 10 bi neix, Gvangjsih giethab gij daegdiemj dieg minzcuz, dingjmaenh hwngfat ndei gyauyuz saehnieb, aeundaej cingzcik yienhda. 2021 nienz, daengx gih ngaenzcienz itbuen gunghgung yawhsuenq daengz 1105 ik maenz, lai gvaq 2012 nienz 518 ik maenz, bi bingzyaenz demlai 7.3%; cungh siuj hagdangz caeuq youwzyenz hwnqmoq 2526 aen, youwzyenz goengbanh aen yanghcin lawz cungj miz, yivu gyauyuz aen ban hung ban vunz lai cungj cawzsiu bae liux, aen bujdungh gauhcungh guhyienh yienhyienh miz.
(Luz Caudwz)

Daengq Beixnuengx
Ciet guekgingq cuengqgyaj, 10 nyied 5 hauh bauqcej mbouj ok lo. Hoh gyoengq beixnuengx ngoenzciet angqyangz vuenyungz!